

四庫全書

史部

欽定四庫全書

錢塘遺事卷八

元 劉一清 撰

張世傑入衛

乙亥三月初十日張世傑入衛京師內空賴張世傑一軍萬人自荆湖至世傑本信安歸正人擢承宣使陳宜中疑世傑易其所部之軍世傑不得以盡其力○呂文福請提兵入衛文福文煥兄也

議遷蹕

宗學上書曰臣等為國同姓與宗社相依為命近者元臣開督視師繼而又聞逆整列斃臣等私竊喜之邇日以來京師內外喧傳皆謂內人今已放歸御船今已排定營衛諸軍皆已點差倉庫今已搬移陛下移蹕亦在旦夕躊躇未即行者獨吾太皇太后不肯輕動爾臣竊為陛下謀者不過移蹕慶元其次則移蹕平江至事勢危急則航船幸閩不思我能往彼亦能往縱使兵或可守陛下豈能鬱鬱求活作一龜茲國耶北兵渡江已踰

兩月不聞有備禦之策但聞和議之請和議未必能成
危亡之勢漸迫今天下勤王之兵在京屯戍者不下二
十萬猶堪一戰豈束手待斃而已哉臣願陛下戒諸將
帥糾集精兵盡力血戰戰若不勝死於社稷猶可見藝
祖於地下惟陛下思之幸甚

陳宜中奏

殿院陳宜中奏云近北兵渡江已踰兩月上而三宮下
而萬姓皆謂平章賈似道督師一出未必負三朝禮遇

之恩必能以一死酬天地涵容之澤而乃擁師逗留不

發一矢今月二十日忽報孫虎臣

此下疑有闕文

又二十二日

報臣等以諸軍皆潰散初猶有自與一決之語既乃發
為海上迫駕之言臣見其平日自詭以知兵意或有深
謀祕計可以救一脈於垂亡觀其所措有非腐儒所能
測識忽二月二十八日早有督府隨行吏回歸乃言似
道於二十日夜三更鳴鑼一聲喝散諸軍竄身而去莫
知所之臣聞之血淚迸流欲死無由因自痛念曩經丁

大全敗竄之餘適際理宗再生之德徼逾末年似道時
適當國起自書生叨居向地彼雖一出臣每見其施行
時有差舛未嘗不從容納規而才弱力凡莫能救正如
范文虎事爭之不力稔禍今日涕殞何追今似道以潰
師竄身上誤宗社臣曩為臺諫既無呂誨之先見臣今
為執政又不能為社稷之力爭罪何所逃謹具自劾以
聞欲望聖慈重行追竄正平日苟容之罪以謝公論仍
乞正似道誤國之罪以謝天下祖宗德澤未衰人心戴

宋猶故元氣一脈尚可挽回仍乞將公田市舶茶鹽等
拂民所欲者悉賜改正令學士院降詔以明太皇太后
陛下哀痛悔恨之意少回皇天舍逆助順之心

陳宜中都督

陳宜中都督軍馬時乙亥四月也奉旨建督于京檄召
諸路軍馬勤王并令潰軍各歸所部淮東隸李庭芝淮
西隸夏貴松江隸汪立信四川隸朱禔孫河西隸黃萬
石節制團結內外兵十七萬五千人分廂差寄居官為

總督給以兵赴教場教閱

詔諭三將

五月太皇太后詔諭呂文煥等息兵通好詔曰賈似道專制朝政十有五年挾智私行矜已自用結怨軍民失信鄰國戰功當賞而不賞邊費當支而不支盡心力以守襄城者坐視不救備已財以贈郢兵者反受責言遂使諸將離心三軍解體比者請師出督畏死偷生不戰而逃莫知所在自古失律之師未有如此之繆者吾已

節次明正其罪但念吾年七十抱病滋久嗣君幼冲
旣在疚念北方之兵薄吾近地宗社危急不可以一朝
居似道名禍如此老身幼主實受其殃因思爾文煥世
受國恩久當事任守城六載殊殫勤勞爾奕爾文虎皆
受先朝之知嘗任岩師之寄一時捨此度非本心三人
在北豈能遽忘本朝之舊不念吾國之危茲用手披敷
陳吾意爾三人為吾轉道此意於帥相吾老幼雖不足
念生靈何辜受此荼毒不知何道可以息民何辭可以

通好于北朝以成南北之美意以紓社稷之近憂願亟
為我圖俾王室不壞理宗度宗在天之靈亦必降于爾
衷故茲詔示想宜孚悉

呂文煥回本國書

報國盡忠自許初心之無愧居城守難豈圖末路之多
差茲祈轉念昔日之功庶可少伸今日之款明公問信
歸人欲言伏念某少服戎行壯臨邊徼干戈滿眼輕性
命於鴻毛弓箭在腰繫死生於馬足不但驅馳於西北

誓將屏蔽於東南幸以微勞屢收薄效至若襄城之計
最為淮甸之危蠢茲無厭之鄰指將必攻之地迅裂如
水火之衝擊飄蕩如風雨之去來坐一日為尤難居九
年而可奈南向高築蓋欲拒吾喉襟樊城盡屠其在剪
我羽翼雖劉也首先於犯順而焦然中告於黨姦孤城
其如彈丸謂靴尖之踢倒長江雖曰塹固欲投鞭而斷
流兇焰如斯先聲屢至臣能死爾仰天而哭伏地而哀
男既生氓析骸而爨易子而食尚冀廟堂之念我意令

鄰郡之聚兵委病痛於九年之間案几肉於羣虎之口
因念張巡之死守不如李陵之詐降猶期後圖可作內
應國手局敗留著此豈奕尋常之機俗眼圖耳觀形奈
不識驪黃之馬蓋使忠臣偶陷於敵國從亦絕意不念
於鄉閭固知死也何補於生安有食焉不任其事因銜
北命乃擁南兵視以犬馬報以仇讎非曰子弟攻其父
母不得已也尚何言哉今皇上亶其好生開以自新之
路明公都督雖是問罪藹然念舊之情安敢固違永為

背叛見今按兵不動臥轍不驚撫此良臣伏覩景命且秦穆公之救殺馬在野人猶知報恩如齊桓公之相射鈎願君子終無忘怨

督府檄文

畧曰且整之叛我也固以自疑若煥之去國也獨何不
忍不思桓溫羣從並受卵翼之恩李陵一門初無毫髮
之損國家危運一至於此人心忠義夫誰無之太皇后
七袞之聖躬今天子孤惇之冲質在人情猶知恤鄉閭

之老幼矧人子忍坐視君父之傾危寧無郡國表臣亦有江湖豪傑共僉倡義之旅載馳勤王之師如陶士行慷慨之真如張魏公忠赤之至救日之弓救月之矢便直指於旌旗如礪之山如帶之河尚永堅於盟誓

王爚平章

乙亥四月王爚平章軍國重事八月王爚致仕爚具位平章在朝無所建明不顧君父之顛危退為保身存家之計鄙哉

日蝕

乙亥六月初一日午時日有食之既是時天地晦冥咫尺不辨人鷄鶩歸猶如暮夜自己至午其明始復。詔曰天降罰于我家嗣君幼冲未堪多難吾以衰耄勉強聽政明不能察奸臣之誤國仁不能救兵革之殄民德澤弗流政令多失乖氣致異謫見于天廼夏季月朔日有食之既陽微晝晦變莫大焉吾惟艱危之會憂心如熏重以災異謹告于何不臧憂咎在吾痛自先責貶損

尊號尤恐未盡應天之實方與嗣君夙夜祇懼省躬悔
過慨念奸臣專政之久杜塞賢路蒙蔽天變下情壅於
上聞禍至此極今吾自儆悟少懲艾虛心聽政惟人言
是聽以答天意咨爾百僚士庶盡忠極言凡涼菲之愆
政事之疵黎元之疾苦爰暨修禳固圉之常策可以捐
厄運導和氣者毋有隱之將採擇施行人心悅而天怒
解庶幾在此布告中外體吾至意○太皇太后內批痛
自切責以答天戒可去聖福二字用昭吾恐懼脩省之

意

陳留並相

乙亥六月陳宜中左丞相留夢炎右丞相陳文龍黃鑄
僉書樞密院事謝堂鎮撫使家鉉翁知臨安府○文天
祥刑部尚書趣赴行在○夏貴淮東制置知揚州朱煥
淮西制置知廬州召李庭芝赴行在夏貴不受代李庭
芝閉城自守

文天祥入衛

乙亥四月文天祥為江西提刑募兵於贛州吉州杜澣糾合四千人從之至九月天祥將吉贛民人及峒丁二萬人入衛衣裝器械戈甲精明人心喜慰詔褒獎除江浙制置使知平江府提兵捍禦○時陳宜中歸永嘉留夢炎當國夢炎意不相樂乃以天祥為制閫出守吳門徵諸帥不至

徵呂文福入衛行人失辭文福自疑不至○徵夏貴督萬壽黃萬石入衛並不至○京城招軍年十五以上號

武定軍長不滿四尺觀者寒心

諸郡望風而降

乙亥三月知江陰軍鄭濡道遁○知廣德軍令狐降○
三月十四日下平江府守臣潛說友遁通判胡玉以城
降○下安吉州守臣趙興立降江上列城或降或遁無
一人堅守者○四月下江陵府高達京湖名將已未解
圍鄂州似道許以建節後竟不與達怨望久矣至是為
京湖制置以城降宣闡不能制城初陷朱禔孫仰樂不

得死既而亦降焉乃令朱禩孫移文諸州歸附○鼎州
澧州常德府壽昌軍並降○大兵徇湖南圍潭州安撫
李希與大兵戰于澧陵得捷守城攻之不克○九月大
兵至獨松關殺廉萬戶希賢後丙子二月廉希賢之子
殺張濡礫之濡俊之曾孫也○十一月十六日大兵下
隆興府劉槃以兵累戰不利遂以城降牛傳危天順二
將赴火死○瑞州先下姚計議至隆興說降劉槃拒之
乃引兵出戰殺戮不小凡累戰不利不得已而以城降

○大兵至撫州時制置黃萬石開閫撫州聞大兵至而遁都統密侑迎敵就擒不屈嚼舌罵聲不絕而死施至道以城降○建昌相繼而下○朱帥戰于相關敗績去杭百里○獨松關告急召文天祥入衛天祥自吳門還遣守獨松關時天祥軍三萬張世傑軍五萬諸路勤王師猶有四十餘萬天祥與世傑密議今兩淮堅壁閩廣全城王師且衆何不與之血戰萬一得捷則罄兩淮之兵以截其後國事猶可為也世傑大喜遂議出征獨宜

中沮之事不成矣○二十八日攻平江府通判王矩之以城降○十二月大兵屯平江府伯顏在焉京師戒嚴留夢炎陳文龍黃鏞劉黻並遁○大兵屯於長堰陳宜中蒙蔽外庭陰遣使請和見伯顏於長安堰已而不如約故大兵竟至皋亭山○丙子正月大兵入臨江軍權守滕岩瞻遁臨江告急吉州乞兵援守吉州差禁軍三百人至臨江防拓舟必從吉水敢勇軍守吉水陸必從永豐忠勇軍守永豐未幾大兵至禁軍潰散大兵入臨

江大兵更自桐江疾馳至吉州城下○十八日大兵進
皋亭山去城三十里北使請執政軍前議事文天祥請
行○百姓官民迎丞相伯顏于皋亭山○十九日大兵
進屯北關門外東城百姓門各各帖好投拜三字呂文
煥范文虎九騎入城遂入大內謁太皇太后

納降表

乙亥十二月遣使納降表直學士高應松辭草表乃以
京局官劉褒然權直院草之○自賈似道喪師後至今

十餘月國事危急將士離心兵出屢衄朝廷方理僉科
場明堂等事士大夫陳乞差遣士人覬覦恩例一籌不
畫及是束手無措乃議納土永為小國賁降表奉使燕
京哀哉

詔罷兵

宋皇太后詔文天祥罷兵詔曰卿之忠義朕已素知
見今遣使請和卿宜自靖自獻慎勿生事乃所以保全
吾與嗣君也天祥捧詔號泣於是不敢出師矣

罷團結

乙亥十二月宋太皇太后詔民兵罷團結○太后詔南北講和京城內外民兵罷團結三省榜諭京城百姓兩宮慈仁保全生靈南北見議講和毋致惶惑

二王航海

丙子正月十二日命秀王與擇奉皇兄廣王昱皇弟益王昺出宮航海

宜中夜遁

陳宜中十月再相國事亦危矣至丙子正月十八日大兵至皋亭山要以相見宜中夜遁十九日以賈餘慶為右丞相吳堅為左丞相謝堂樞密使家鉉翁叅知政事劉岳同知樞密院事是時宜中遁文天祥辭右相不拜遂以賈餘慶為右丞相朝廷愈無統矣

文魁辭相

丙子正月十九日除文天祥右丞相兼樞密使天祥辭不拜除資政殿大學士北師邀當國者相見執政侍從

交贊公出天祥曰國事至此吾不得愛身辭相印不拜以資政殿學士行天祥至皋亭山伯顏丞相引見天祥抗辭慷慨議論不屈遂留之不使歸南遣王千戶館伴

京城歸附

丙子正月二十日大兵入臨安府太皇太后請降○太皇太后詔江南諸郡歸附詔云今根本已撥諸城雖欲拒守民何辜焉詔書到日其各歸附庶幾生民免遭荼毒○賈餘慶令學士院降詔俾天下歸附之各付一省劄惟

家鉉翁不肯署押吳堅一如賈餘慶之命程鵬飛作色欲縛鉉翁鉉翁云中書無縛執政之理歸私廳以待程竟不敢誰何○朝廷自乙亥十二月至丙子正月信使往來和議未決正月二十四日北使請宰執親往燕京朝覲於是吳堅賈餘慶家鉉翁劉岳文天祥五人為祈請使朝廷百官或在或遁至是為之一空○二月初一日伯顏丞相指揮收京城軍器○十二日索宮女內侍樂官諸色人等宮人赴蓮池死者甚衆○二十日北

使請三宮北遷二十二日宋少帝令太后隆國夫人黃氏朱美人王夫人以下百餘人從行福王與芮參政謝堂高應系駙馬都尉楊鎮臺諫阮登炳鄒珙陳秀伯知臨安府翁仲德等以下數千人太學宗學生數百人皆在遣中惟太皇太后以疾留大內

潭州死節

丙子正月大兵破潭州李芾守潭竭力備禦凡八九月其間出戰屢捷而大兵之攻日增芾不能支城破之日

命積薪樓下於是携家人盡登樓大宴積金銀於兩畔
李與館客廟坐其餘列坐左右數盃後命喚二劊子來
既至則令將此金銀去與你家口取法刀來一不肯受
一會意徑受之携去分付家人後須臾將法刀至李帥
呼之至前分付先從頭殺入到尾殺我待我點頭時下
手復飲酒良久點頭惟館賓與一妾墜樓而走妾折一
足最後李帥伸頭受刃此劊子遂四面放火自刳其腹
而死○潭州陷衡州茶陵軍袁州相繼而下○後李兩

山有詩題潭州驛懷李肯齋曰天運由來有廢興義無
兩大一身輕封疆社稷若不死婦女鬚眉何用生組解
三綱重接續灰寒萬劫獨光明便當配食三閭廟啟迪

民彛開太平

三閭水死
肯齋火死

吉州歸附

丙子二月大兵至吉州權城同天驥以城降宋都反元
帥○大兵循浙東至嚴州知州方回降至台州知州楊
必大降至處州知州梁信降衢婺等州並下

揚州死節

丙子五月廣王登極除李庭芝為右丞相六月底芝棄揚州引兵至泰州欲航海至福州大兵追及之庭芝凡戰數合大敗遭擒元帥斬庭芝于軍前八月大兵攻淮東破揚州朱煥以城獻姜才死之姜才淮之猛將前後主將皆其人也姜才屢戰大捷大戰三日姜才身生九疽不可掛甲遂敗至泰州被執不肯降臨刑含血罵聲不絕口淮人言之無不傷歎

錢塘遺事卷八

欽定四庫全書

錢塘遺事卷九

元 劉一清 撰

丙子北狩

祈請使

左相吳堅

天台人

右相賈餘慶

海州人

叅政劉岳

重慶人

樞密文天祥

吉州人

叅政家鉉翁

眉州人

奉表獻璽納土官

監察御史楊應奎

廬州人

大宗丞趙若秀

臨安人

日記官

宗丞趙時鎮

廬州人

閣贊嚴光大

紹興人

書狀官

御帶高州太守徐用禮

臨安人

潮州通判吳慶月

臨安人

惠州通判朱仁舉

闕人

處州通判沈庚會

闕人

浙東路鈐吳嘉興

闕

人

掌管禮物官通事

總管高舉

江陵人

總管吳順

闕

人

提舉禮物官

環衛總管潘應時

闕

人

總管吳椿

闕

人

環衛總管劉玉信

揚州人

掌儀官

浙東路鈐詹困

闕

人

帶行官屬五十四員

隨行人從二百四十人 扛擡禮物將兵三千人

北朝館伴使

巴延丞相貼差特穆爾萬戶

阿珠元帥貼差焦愈相

祈請使行程記

日記官嚴光大錄

德祐丙子二月初九日宣奉大夫左相吳堅自天慶觀
方丈出北關門送通議大夫右丞相兼樞密使賈餘慶
銀青光祿大夫樞密使謝堂端明殿大學士中奉大夫

充祈請使劉岳丞議郎守監察御史充奉表納土官楊
應奎朝奉郎充奉表納土官趙若秀當登舟時南北朝
阿里議事傳已延命留吳相登舟泊于北新橋岸下終
夜流涕北軍差軍前索多相公勉諭之此日會文天祥
于軍前忠義激烈分辨夷夏遂激北朝丞相之怒遂點
差堅戰頭目守之

初十日樞使謝堂納賂免行遂回○是夕泊謝村

十四日舟次平江府北官宣撫使就閭門接官亭令妓

置酒待吳文二相不赴晚催登舟馬軍三百餘人泐塘
護送至無錫縣

十五日舟次無錫是日特穆爾萬戶生日四府俱送壽
儀就三登倉橋上特穆爾舞勸夜泊常州十里鎮

十六日早舟次常州燬餘之屋無路殺死之尸滿河臭
不可聞惟此最多次過奔牛鎮夜泊呂城白骨堆積如
山

十七日早過呂城堰換舟到丹陽縣泊七里廟

十八日行過新豐市遇一舟有北朝國師劉叅政舉酒
勸之次至鎮江府韓蘄王廟前有招討石祖忠招討張
郎中携妓樂獅豹勸酒迎入府治同特穆爾留客於府
治後堂泊舟丹陽館後

十九日府第率衆官渡揚子江入瓜洲見阿珠平章留
宴於圖魯萬戶張郎中房子

二十日阿珠元帥統諸臣從官同太皇太后續差到閣
贊吳忠翊督戰孫通直賁手詔帶北朝馬數千往揚州

至揚子橋砲聲連響繼至城下一砲震天城上旗幟雲
擁軍船放划車弩密如雨再一砲響陰雲四合冷雨大
作驟如傾盆勢不可進阿珠平章請回揚子橋茶飯罷
入瓜洲

廿一日雨雪大作疾風驟發江濤洶湧不敢發舟再泊
瓜洲

廿二日雪霽諸使回鎮江府

廿三日吳閣贊孫通直阿珠平章欲命諸使親札勉揚

州制置李庭芝納降衆從之獨文丞相不畫名繼而平章先索藁及諸官札成無計可達其地分各有軍馬把截時有遊騎出從夜泊舟中

廿四日宴于鎮江府治夜泊舟中

廿五日夜泊舟中

廿六日巴延夫人自臨安回○夜泊舟中

廿七日夜宿舟中

廿八日焦僉省諸使宿鎮江州治

廿九日渡江夜泊舟中○至夜文丞相脫去

三月初一日早方知文丞相已脫去閉城三日搜覓不見收從人幹僕并管伴使千戶及總管等人囚之夜泊舟中

初二日宿於揚子橋園內○乘鋪馬

初三日宿灣頭○午前有揚州都統萬戶出戰士氣百倍其鋒不可當乃退

初四日過邵伯鎮徑行一堡子闊六十里北軍屯戍又

有水寨屯軍甚多內有小堡子六十餘所博羅相公阿
里右丞在內宰馬置酒延待諸使忽報揚州北門軍馬
擁出姜才分陣殺奪交傷不少相持半日及暮博羅相
公以軍馬相距而退○中路遇廬州一卒云淮西廬州
夏貴已於三月初三日投拜見賁降書至阿珠平章處
有軍馬數十護送蓋揚州未降故也晚宿荒屋內路上
尸骨如山

初五日過天長縣宿荒草上坐以待旦有尸滿野

初六日渡天長河無舟滿河皆腐尸夜宿荒草

初七日過寶應軍

初八日過招信軍至淮安界忽望見旌旗雲擁砲響震天有數隊人馬出戰矢如雨下乃許文德兵馬親臨軍陣殺傷不少特穆爾萬戶集兵拒守及日晚方退夜遂移屯宿於荒草

初九日過甘羅城渡清河口至清河口守渡衆官迎入軍治設宴出城宿舟中

初十日舟離清河口過小清河口七里莊轉河至桃源
晚宿舟中

十一日宿舟中

十二日宿宿遷僅有二十家舟泊野岸

十三日舟行晚宿邳州城外邳州離城遠接置酒作樂
會衆官於草廬下夜舟泊圮橋子下即子房擊始皇博
浪沙中副車遂逃于此子房進黃石公履即此橋也自
此人皆戴笠衣冠別矣

十四日換舟諸官入邳城去看風俗城壁圯頽民居草座自此經過州縣只如此晚宿野岸

十五日早發淮陰屬徐州界道左有元祐間石麒麟院所立鎮碑是晚徐州府臣携酒至款諸使夜宿舟中其日乃清明諸使感懷

十六日抵徐州換舟宿野岸

十七日舟行午過留城少泊父老云此是漢高祖封子房為留侯即此城是也有廟碑記在焉過九里

原有缺字

十八日次沛縣乃魯地也高祖生於豐沛去沛二十里沛民聞宋朝宰相等官至家家門首焚香迎拜申牌後過鷄鳴臺晚次舟河口魚臺縣昔春秋隱公五年觀魚于棠即此地也

十九日舟行午至谷亭馬頭申時過魯橋有四洞水流甚急橋畔有四天王之祠晚宿魯橋

二十日易行李上車屬官皆乘鋪馬酉牌抵新州夜宿縣治即濟州也

廿一日車行酉過汾陽即郭令公所封之地夜宿于縣治

廿二日車行午至東平府夜宿嚴相公家

廿三日東平守置酒高會于宣聖廟聖像雄偉殿宇宏麗去宣聖墓二百里一人云墓有巨木皆三丈圍夜宿嚴相公府此處風俗甚好商旅輻輳絹帛價目十一路經過惟此為最

廿四日車行申抵荏平縣宿縣治

廿六日車行過合城鎮午過臨城鎮勝果寺有周柴世宗廟遺像存焉自東平府去村聚頗繁麥畦桑畝一望不斷晚至高唐平原縣係趙地戰國封平原君處夜宿縣治

廿八日車行至陵州陵州郡守迎諸使宴畢宿州治廿九日易車行陵州西關就衛河登舟午後過林鎮屬河間府有梁山伯祝英臺墓夜宿于岸

三十日早行舟已抵灌縣界東光縣焦僉省置酒宴于

縣治夜泊野岸

閏三月初一日舟至長蘆鎮土人云小燕京蓋人煙輻輳此地產鹽有鹽運司鎮南有浮橋妓樂雜劇宴待諸使未牌舟抵興濟縣西抵清州夜宿舟中

初二日舟行過清河鎮去海不遠夜泊鎮內

初三日舟過清河鎮水冀河或海風大作吹沙走石是夜宿舟中

初四日早抵楊村歇于館驛焦僉省差楊村巡檢下鄉

科民戶辦車三十輛夜宿驛內

初五日諸使宴焦僉省于駟中

初六日車行午過武清縣東有孟克皇帝選命賢才牧民德政碑進士趙崇選撰夜宿州治

初七日車行過王臺鎮四望黍麥青青午過分頭土人云此地甚冷五月方可養蚕麥苗長不滿三寸六月方食麥次抵德仁府此地屬遼陰縣

初八日拂明諸使率官屬詣德仁府永壽寺啓建太皇

壽崇聖節道場退宰執來議勘會國信取禮物已近燕
京護送官吏督擡兵級併祇候人各與給犒須議指揮
○護送禮物官徐用禮特與轉行武功大夫帶御器械
知高州○日記官嚴光大特與轉武翼郎陞閣贊添差
福建路馬步軍副總管福州駐劄○大通事高舉特與
轉武經郎帶行環衛官添差西路副總管臨安府駐劄
○尚書府都事吳慶用特轉朝奉郎添差通判潮州賜
緋○尚寶省錄事朱仁舉特轉奉議郎差通判惠州事

賜緋○中書省錄事沈庚會特轉奉議郎差通判處州
事賜緋○尚書省令史陳充謙特轉宣教郎○樞密院
丞旨胡禰特轉武功郎添差浙東路兵馬鈐轄○國信
所掌儀詹囡轉武功郎浙東路分紹興府駐劄○專庫
龔友諒陸鎮各轉承信郎○直省所劉某鍾應辰沈文
亨鍾大有各轉承信郎陳聰姚安國石寶林恢各補進
義校尉○扛擡禮物節級等各有犒賞

初九日甲辰過大興縣至滂村宿是日賈相病

初十日馬入燕京陽春門諸色妓樂等祇候迎入會同館焦叅政勸酒館內歇來遠堂賈右相家叅政歇于穆賓堂右吳劉二相歇于穆賓堂左屬官分歇後堂從者分歇前兩廊此館係大金四大王府今改為驛兩廊有八十餘間酒食米菜之類專委斷事官分撥輪到各責同知排辦齊整厨子工夫等人分房祇直每日委監察御史等官覺問逐一宣問茶飯好歹賈相病甚仍宿館內

十一日樞密院差軍卒數十人守館內○賈相病重
十二日夏貴至歇來遠之右隨行帶領將佐三百餘人
都人聚觀哂之

十三日樞密院差太醫診賈相脈投右膏散疾愈篤
十四日賈相薨衆官大慟

十五日巳時賈相自會同館後門出殯諸官出麗正門
燕京大興總管府排辦神道綵亭中餘座鼓鈸幡蓋之
類送至洞神觀側殯焉

十七日諸使祭賈相于洞神觀

十八日特穆爾萬戶宴諸使

十九日諸使同屬官至樞密值雨入麗正門內右手參
張平章陳參政會少保夏貴端明呂師寶都統洪模并
宰執屬官少保官屬同宴張平章問吳相郊祀典禮儀
仗制度等事陳參政以丞相所言詳細答之席終而回
二十日諸使點視禮物

廿一日已延丞相回諸使出接有大旗書天下太平四

字

廿三日已延上開平府

廿四日諸使出陽春門迓太后嗣君於五里外起居隆
國夫人王昭儀新安宮正新定安康安定夫人天眷福
王沂王謝樞密從駕車大小九十三兩大小宮使六十
餘人張知府濡繼至有緋綠妓樂神鬼清樂戴珠翠衣
銷金乘馬旌隊鎗刀金鼓等迎接入燕京隨駕下車入
中堂內垂簾而坐諸使屬官立班兩拜後班稍側又兩

拜退

廿五日諸使訪謝樞密沂王

廿六日吳丞相劉叅政宴謝樞密等官

廿七日禮物官屬食于宴樂園

四月初一日諸使率屬官詣會同館起居兩宮

初二日焦僉省來訪諸使

初三日諸使會議祈請事宜

初四日諸使宴焦僉省

初五日諸使訪樞密院陳叅政

初六日諸使訪趙同僉

初七日僉省來訪諸使

初八日諸使率屬官詣長壽宮滿散崇壽聖節本觀見
有一真人掌觀宮內道衆八百人

初九日謝樞密沂王宴諸使

初十日中寶訪諸使議赴上都日子

十二日諸使及官屬乘鋪馬出通玄門晚抵昌平站自

此以往步步皆沙漠之地省院諸色人點差一甲隨行
餘留燕京

十三日車馬行晚宿榆林站是日過隘口

十四日車行晚宿懷來站

十五日晚宿洪站是日太后嗣君福王沂王謝樞密離
燕京亦赴上都

十六日離洪站十里到雲州無城一閑人家至州二十
里地名龜門山峭壁對峙有神靈甚晚宿鵬巢站

十七日車馬行晚宿獨石站自昌平站至獨石站亡牆草廬皆是漢兒官人管待名漢兒站

十八日宿牛羣站此去皆草地此乃韃靼家官人管待名韃靼站並無房子只是羶帳韃靼人多喫馬牛乳羊酪少喫飯飢則食肉路中每十里一急遞鋪九州自此通路去

十九日晚宿明安站有床帳無人家

二十日宿涼亭站亦無人家無水可喫取水于十里外

只燒馬糞

廿一日宿李三站無人家

廿二日車馬行四十里至上都開平府入昭德門泊城內第三街官房子自燕京至上都八百里一步高一步井深數十丈水極冷六月結冰五月六月汲起冰六月電如彈丸大一年四季常有雨雪人家不敢開門牛羊凍死人面耳鼻皆凍裂秋冬雪積可至次年四月方消屋宇矮小多以地窟為屋每掘地深丈餘上以木條鋪

為面次以茨蓋上仍種麥菜留竅出火有地屋掘地三四尺四圍土牆此地極冷每年六月皇帝過此避暑冰塊厚者數尺夜瞻星象頗大蓋地勢高故也

廿三至廿七日不許私行不錄

廿八日太后嗣君宮人宮使至昭德門裏官舍安歇福王子傳制在隆國處安泊謝樞密在房子下夫人留伴燕京會同館沂王以疾不入城

廿九日沂王疾亟

三十日樞密院以月旦日請太后嗣君福王同宰執屬官宮人中使並出西門外草地望北拜太廟

五月初一日早出西門五里外太后嗣君福王隆國夫人中使作一班在前吳堅謝堂家鉉翁劉岳并屬官作一班在後北邊設一紫錦采摺即家廟也廟前兩拜太后及內人各長跪福王宰執如南禮又一人對采摺前致語拜兩拜而退

初二日太后嗣君福王隆國夫人中使等天曉盡出南

十餘里宰執同屬官亦列鋪設金銀玉帛一百餘桌在
草地行宮殿下作初見進貢禮儀行宮殿宇宏麗金碧
煥耀諸妃諸王但升殿捲簾列坐皇帝皇后共坐雷中
諸王列坐兩序太后嗣君福王宰執以次展裹腰金服
紫屬官緋綠各依次序立班作朝甚肅皇帝云不要改
變服色只依宋朝甚好班退陞殿再兩拜就留御宴皇
帝問吳丞相云汝老矣如何為丞相領事答云自陳丞
相以下遁去朝廷無人任職無人肯做故臣為相未久

念臣衰老乞歸田里

錢塘遺事卷九

欽定四庫全書

錢塘遺事卷十

元 劉一清 撰

赴省登科五榮須知

兩覲天顏一榮也
臚傳天陛二榮也
御宴賜花都人嘆
美三榮也
布衣而入綠袍而出四榮也
親老有喜足慰
倚門之望五榮也

省試

正月二十五日午間鎖院

至晚宣押省試官入院

試前一日省試院引保或不用親臨只貢之書鋪

書鋪納卷鋪例五千自裝界卷子與之或只二千無定價過此無害也

宗子又有一宗文字頗多非四千不可特奏名納卷亦三千

二月初一初二初三日引試詩賦人

初五初六初七日引試經義人

初九初十一日引試宗室鎖廳應舉人

混經賦為一場

十三十四日引試取應宗子

別試所則又遲經義場一日乃初六初七初八日也

省試案子不得以方州移動

挾書傳義
皆所不可

卷中自有第幾幕印子收納士人自書治經鄉貫姓名押字於歷上若昏黑歷子收去無歷可書大有利

害

御試給號

試前數日書鋪告報士人請號

納卷鋪例五千因鋪家卷子兼得御試須知一

本禮部給正奉名進士號次日給特奏名及四川進士

三色宗子號書鋪知委體例

二百錢與之索添不過三百

請號之日

士人天未明到書鋪黎明而襖幙入都

四字疑有誤

書鋪引

入尚書宰執據案坐于庭中設桌子及歷外吏部依省

榜次第喚姓名而前逐人自書姓名押字于歷記則得

號一枚吏使與之號則唱而戒之曰牢收號入殿不得

搪突號以白紙半片為之有字數行尚書侍郎郎中偕銜押字及有中官某人監集英殿門試日以其號照入殿門一失其號則不得入矣

丹墀對策

廷試之日士人由和寧門入徐行執號樂衛士收數成行而入至集英殿門外中官展視而收之殿外掛混圖于露天甚高良久天大明了然分明知位次士人聚于殿門外待百官常朝畢方引士人進拜列于殿下宰臣

進題上覽焉天子臨軒天顏可瞻起居贊曰省元某人
以下躬拜再拜又躬身而退各依坐圖行列而坐每位
有牌一枚長三尺畧以白紙已書某人某鄉貫或東西
廊第幾人不得移動及污損坐定中官行散御題士人
皆以御題錄于卷頭草紙上以黃紗袋子垂繫于項上
若有損污謂之不恭納卷所不受散題後駕已興入內
進膳賜食于士子太學饅頭一枚羊肉泡飯一盞食畢
不見賜謝恩或要登東作旋則抱牌捲卷子而往衛士

相引而去亦不甚遠既坐而試不得與鄰座說話中官
從官雜處董之宰執巡行至申時天子復臨軒納卷於
殿廷東廡階下之寨中一中官監視收其牌及御題卷
子亦不容人臨時於納處展視若至昏時則見闕傳者
云已不在黃甲矣士人每出一門必書姓名于門東歷
四門皆書姓名押字出時無號無人押行亦不待人齊
出

擇日唱第

皇帝御集英殿唱名非有他殿只掛集英殿牌於殿前
特奏唱名則於數日之後先唱名數日書鋪又告報請
號禮部又散號一如廷試給號之禮及得號視之乃前
日所收之舊號也但於其上用紅印書入集英殿試訖
中官姓名押小字一行耳仍戒曰牢收號入殿不得擔
突書鋪告報之人又有所求先量支少與之不得開口
唱名之日亦由和寧門而入身襴袍而足亦穿靴列行
舉號數人收號一如廷試之日候南朝畢贊者引入廷

下再拜皇帝臨軒宰臣進三名卷子讀于御案前用牙
篋點讀畢宰執立于上前閣門立于御案之西向宰執
先於御案前拆視姓名則曰某人閣門則承之以傳于
階下衛士凡六七十人皆齊其聲傳其名呼之謂之臚傳
亦謂遶殿雷也凡呼而唱者三四聲士人方從衆中出
應衛士夾而翼之問以鄉貫父名翼至廷下對玉墀且
躬未拜廷上問以鄉貫父名衛士則以對對畢過軒下
少去就甲人次其榮在此也非特名登天府三代祖父

之名達於聖聽矣待一甲畢則往兩廊角取勅黃而執之甲內人齊則廷上呼謝恩士人廷下立躬身再拜而退去于軒下狀元則便獨班謝恩不待甲內齊也自第二名第三名為一班便賜食相身為袍各設位賦詩以答皇恩第四名至第十名終為一班第二甲全甲為一班謝恩了皆且執勅黃而立勅黃用麻紙兩幅連粘大書某人等宜唱某等科第

狀元至第二甲終皆曰宜賜進士及第

第三甲第四甲終皆曰宜賜進士出身

第五甲則曰宜賜同進士出身

勅黃可漏子又長於勅黃一尺唱第二甲盡駕興入內

進膳須臾賜進士食三品赤焦肉餅二枚天花餅二枚

只是素餅羊肉飯一盂并羊羹飯肉有盪粉皆三品餅至

上方起衛士已將

下三甲名字來排當士人兩衛士管一紙一紙書十五
人名字皆先自喚集排當資次仍問鄉貫父名審畢候
上復出殿上一呼某人則衛士已夾其人而進于前駢

貫而進亦候一甲齊方拜謝恩授黃勅有恩例陞甲人則當殿上宣示上旨某人有某恩合陞一甲末所以方走唱名之人雖有恩例亦不可自陞甲蓋陞甲人面授出旨當殿謝恩故也若無陞甲恩之人不入赴唱名傳者曰待二年外方許到却唱至第五甲上亦入少憩頃之待出唱第五甲畢士人皆執勅黃再拜殿上傳曰賜進士袍笏袍笏積于殿外之兩廡下士人出殿門於上廊爭取之往往皆不暇脫白襴而便就加綠袍於其上

其所賜淡黃絹衫一領

袖如綠袍之寬大

淡黃帶子一條綠羅

公服一領笏一面士人披衫繫帶未畢則殿上催謝恩
謝恩罷拜而出紫綠相間環堵可觀紫袍牙笏以取左
宗子拜所賜也擁而趨出門頭亦不待書名字蓋前日
秀才今日官人五榮之中此屬其最唱名時不可一聞
姓名遽然而出尤加詳緩之為佳唱第既出至大門外
人備車馬以須其出者十有五六若自有車馬雖不用
支散然群不逞隨之呵殿元者數十為隊所費亦不貲

不若只行出內門前茶店中待其人疎洒行歸耳狀元榜眼探花須皆與上馬蓋臨安府自備馬以待之也

置狀元局

狀元一出都人爭看如麻第二第三名亦呼狀元是日迎出便入局局以別試所為之謂之三狀元局中謂之期集所大魁入局便差局中職事一一由狀元點差牒請糾彈牋表小錄掌儀客司計掌器掌酒果監門多者至五六十員少者亦不下四十員視事官送牒例皆二

十初第人多喜入局得陪侍三狀元與諸同年款密宅
日仕途相遇便為傾蓋常例五日一會食否則日中有
酒杯點心果子二色局中職事官雖多入局而食者常
半之食罷出入無妨三狀元常宿於局中不可出宿於
外月餘而罷局凡預局中職事官員納小錄題名錢非
職事官須納錢五千而後得小錄題名一本狀元入局
之初依全賜錢一千七百貫及諸公納到助小錄錢亦
一千三百貫有奇

三狀元入局五日職事官入局局中以職事官名申臺部十日後正謝

正謝日係太史臺擇日亦謂之門謝禮用牋表皇帝及東宮牋表隔日計會閣門通進表中止用三狀元名銜正特奏同日而謝是日亦由和寧門而入在常朝殿門外北面天顏贊者引唱躬拜再拜而退門外有立仗馬及衛士等衛士唱喏畢馬退士人方列班而拜拜君之門而已

越二日拜黃甲於貢院

黃甲者由省中降下唱名既畢省中以其所升甲之人附于甲末用黃紙以書之故謂之黃甲是日貢院設香案於廷下狀元引五甲內士人拜香案禮部亦遣官來贊導置黃甲於案中望闕拜畢士人列兩廊四十以上東廊四十以下西廊其日擇一人最年高者上堂大魁拜之年高者答拜又擇一人最少者上堂拜大魁大魁亦答拜而退人吏以紙筆請各書姓

名依黃甲排與臣者鐫于題名石是日謂之叙同年
拜黃甲也特奏不得預焉

越四五日鄉人之官于朝者為鄉會以待鄉中之新第
者

越三日赴國子監謁謝先聖先師祭前三日狀元點差
職事官十四員

監禮官彈壓職事之不恭者

奉禮官跪于先聖先師座前奉幣進之于獻官

太官酌酒以進之于上三獻官

太祝讀祝

分獻官十員分獻于十哲及兩廊賢臣一人分獻十五位每位皆之拜搢笏興伏拜起皆贊者導之禮畢而班退贊者皆太常寺差來

越三日局中職事官下湖運司做二大舟局中連三狀元凡七八十人分坐于兩舟酒數行借張侯之真珠園散步侯家亦有餽焉其例也薄暮艤舟于玉壺園而竟

席

書鋪告示越十日引正奏各黃甲士人射上自按試于講武殿

次日賜聞喜宴于貢院齊而後押宴官率官屬及進士列拜于庭下面闕設香案侍從及貼職官皆預焉凡拜五舞蹈其節有四共十拜也拜訖正奏各坐于東廊特奏各坐于西廊立亦如之小黑桌子坐則青墊果子人各四器望果一器望花一朶醯醢列于前初坐先斟酒

三行不下食第三酌下旋鮓一碟第四第五皆有食以

配酒五行而中歌人賜宮花四朶簪于幘頭上

花以羅帛為之

從人下吏皆得賜花又有例賜冰再坐分與士人又到

班庭下再拜謝花簪而謝之兼坐帶花又四盃而竟席

前筵

羊半體七寶頭羹並皆奇品

初坐則以銀臺盞酌再坐則易以

銀卮共九行而飯則粟米為之畢宴不用謝恩退皆簪

花乘馬而歸都人皆避其赴御宴回也

次日局中自用錢作期集所會遵前例也亦七盃正奏

各皆預焉亦就貢院為之

越十日集注


是日天拂曉袍笏書鋪引入部前數日部中先榜于門亭書鋪錄示新第人先擇其願授者而書于笏及入部郎中坐庭中以殿榜資次而呼前廷上唱曰某官人上階揖問曰願受甚處闕對郎中視簿合受則揖廡下書簿中某人願授某州某官闕而退三狀元皆送闕不與集注告勅一道印紙一軸信符一道

門謝闕子一道

常例皆賜御寫經書一軸或賜御製詩一首

臨安府鐫
碑袞裝賜

宴時以分
賜士人



錢塘遺事卷十